

Augustus 3, 2020

www.awemainta.com


www.facebook.com/awemainta

noticia@awemainta.com

583-1400



AWEMainta



POLISNAN TA TOPA CU MUHER ILEGAL TA HACI SEX CU 2 HOMBER LOCAL

AYERA mainta den careda di 10 or riba caminda Polis a topa cu un situacion bastante sospechoso na Rancho pabao di Natural Bridge. Aki e Polisnan a topa cu un Nissan Almera blanco para dilanti di e rancho. Y ora cu nan a baha pa bay mira mas a leu, nan a bin topa cu un dama di nacionalidad Venezolano den accion sexual cu dos homber local.

E agentenan aki a pidi e muher concerni pa su papelnan, pero e no por a muestra cu e tin papelnan necesario cu e ta “legal” na Aruba. Tambe e Polisnan a pidi e doño p’e papelnan di e auto, pero e tampoco no por a demostra niun documento valido di e auto. Polis mesora a confisca e auto y a pidi pa un takelwagen.

Mientrastanto e doño di e auto a keda atende su caso cu e Polisnan, mientras e di dos homber yen di berguensa a core scondé pasobra un di nan ta un homber casa of tin un pareha y sigur esaki lo afecta su relacion.

Polis a hiba e muher ilegal pa Warda di Polis y lo wordo entrega den man di Guarda Nos Costa, caminda nan lo mester haci control si su papelnan ta na ordo of no.

Na final Polis mester a pone e dama den boei, debi cu el a cuminsa bira hopi agresivo tambe. Pa loke t’e 2 hombernan no a keda nada cu e Polisnan a yega te eynan comosifuera ta fin di mundo pa strobanan y riba dje bay cu e auto tambe !!!



**INVEST
SECURE**




We don't just say it ... We Guarantee it !!!

You can focus on your business

If you leave your security protection up to us.

Call 582-7252 for a free presentation.

Email: insec@setarnet.aw



Market Leader of Business Software in the Caribbean

= exact

Solutions for:

- Finance
- Wholesale Distribution
- Professional Services
- HRM, CRM and BPM

VCC
International NV

*Supports All Your
Business Activities & Processes!*

Tel. 583-7072 | info@vcc-int.com | www.vcc-int.com

Momento historico den Parlamento

Fraccionnan ta suspende reunion di Parlamento pa bay sinta cu Prome Minister

NO ta loke Minister Marisol Lopez Tromp a presenta diabierna ultimo den Parlamento, a pecura pa hopi impacto, pero tin otro desaroyonan cu ta confirma e hecho cu Parlamento di Aruba, sigur e grupo cu tin mayoria aworaki, nan mes no ta respeta loke nan ta representa den Consejo Legislativo aki.

Henter e falta di incapacidad aki a cuminsa for di diadomingo 26 di juli ora cu 4 miembro di Parlamento, a firma e peticion pa un reunion pa kita nan confiansa den Minister Marisol Lopez Tromp, exigiendo un reunion mas pronto posibel.

Diabierna ultimo Ricardo Croes di RED ta declara cu e ta sinti cu el a wordo malusa y a duna e impresion cu e no tabata na altura di e motibo di e reunion, pero ta dificil pa kere cu Ricardo a haya un papel blanco pa firma p'e reunion. E documento aki a wordo 'ingeklaard' dialuna 27 di juli pues si esey tabata e caso e lider di RED por a bay over na denuncia esaki, pero no a haci'e, pero diabierna ultimo despues di a firma e carta pa baha Marisol, Ricardo Croes ta bisa cu e tin tur confiansa den e Minister. Tur loke Minister Marisol Lopez Tromp a trece dilanti den Parlamento diabierna ultimo, tabata en realidad un muestra di e incapacidad y seriedad di Parlamento, sigur e tres fraccionnan cu ta sostene Gobierno, miembronan cu a sostene e maneho di e Minister anterior, kendenan a kere ciegame den su maneho, a aproba na dos ocasion miyones di florin adicional pa sigura futuro di Serlimar.

Aki tin cu bisa cu Minister Marisol Lopez Tromp tambe tabata un di esnan cu a elogia maneho di e ex Minister Otmar Oduber, el a aplaudi su maneho, su vision pa cu Serlimar y ningun caminda el a haci un solo pregunta caminda e tabata muestra duda den loke e mandatario tabata haci. Pues Marisol como Parlamentario tambe no a cumpli cu su responsabilidad como tal y pa gran parti e ta culpabel sin duda na loke ta pasando n'e momentonan aki. Kisas e momento mas dramatico den e reunion di diabierna ultimo, lagando e acusacionnan di corrupcion un banda, tabata den oranan di atardi ora cu e miembro di fraccion di POR, Dellanire Maduro a pidi un suspencion di 10 minuut na Presidente Ady Thijsen, cual suspencion a bin dura algo mas c'un ora, te cu el a bira "tot nadere orde".

Dado momento tanto fraccion di POR como fraccion di MEP a bandona sala di Parlamento pa loke despues a bin resulta cu nan a bay den un reunion cu Prome Minister Evelyn Wever Croes na Cocolishi.

Desde cuando un Parlamento cu ta respeta su mes, cu ta hibando un reunion asina delicado riba actonan corruptivo, ta dicidi di suspende e reunion pa bay reuni cu e Hefe di e Gobierno cu nan tin cu controla.

Ta un hecho historico e cos aki, ta un desaroyo cu no ta mucho conoci den ningun pais cu ta respeta su constitucion, ta permiti su mes di wordo ordena manera cu esaki a sosode diabierna ultimo.

Ta Prome Minister tin cu bin otro banda, bin pariba y reuni den 'fractiekamer' y no tur hende manera un grupo di scout, canda bay pabou pa scucha kico Prome Minister tin di bisa.

Pa completa e ridicules di marca mayor aki, Parlamentario Dellanire Maduro ta pidi Presidente Thijsen pa suspende e reunion ya cu Prome Minister a ordena un tipo di intermediacion pa trata di sali for di e situacion politico aki.

Algo cu simplemente no por, sigur pa un Consejo Legislativo cu tin como deber di controla su Gobierno, pa sigui ordo di Prome Minister, kende ya caba a firma hunto cu su Consejo di Minisetr, un carta mustrando cu nan no ta traha cu Minister Marisol Lopez Tromp mas.

Kico mas tin cu papia, kico mas tin di intermedia, Marisol Lopez Tromp ta simplemente di mas den Gabinete Wever Croes ya cu cualkier intervencion of dialogo cu Minister Marisol, lo ta un falta di respet pa partido POR cu a retira Marisol, falta di respet pa un Parlamento cu a bay pa trata un mocion di desconfiansa y falta di respet pa Minister Andin Bikker y actual lider di POR, cu kende tambe Marisol ta hibando un confrontacion, insultando su colega Minister na varios ocasion.

Parlamento tin cu bira serio, stop di permiti su mes di wordo usa y lo ta bon pa aki trece un observacion di ex miembro di MEP, esta Guillermo Prospero Trinidad den felis memoria, kende a bisa: "Ora cu cabaron sali for di lodo y bisa bo cu e ta hole stinki, kere."



EDITORIAL

Revelacionnan di corrupcion pa gran parti ta muestra ineptitud di Parlamento



Pa: Victor (Toko) Winklaar

DIABIerna ultimo Parlamento a trata e mocion di desconfiansa caminda e peticion p'e reunion aki tabata bisa: "Het opzeggen van het vertrouwen in de Minister van Infrastructuur, Milieu en Ruimtelijke Ordening" y cual peticion pa reunion a wordo firma pa miembronan di Parlamento Dellanira Maduro, Alvin Howell, Rocco Tjon y Ricardo Croes.

Tur e 4 miembronan aki ta sostene Gabinete Wever Croes y e peticion aki ya caba a duna un indicacion cu practicamente no tin confiansa den Minister Marisol Lopez Tromp.

Un reunion cu a lanta hopi anticipacion y cual peticion a wordo enforsa p'e hecho cu tur colega Minister di Marisol, tambe a firma un carta den cual nan ta anuncia cu nan no kier sigui traha mas cu e ex miembro di partido POR.

E reunion riba su mes a bira un circo mal bruha, mal hinca den otro y caminda a keda confirma na pueblo, cu Parlamento of mihor bisa e fraccionnan cu ta sostene Gobierno, ta sigui permiti nan mes wordo usa pa cualkier cos, hasta asuntonan cu nan mes no ta na altura di dje.

Esaki pa motibo cu mayoria di miembronan di e fraccionnan cu ta sostene Gobierno, ta Parlamentarionan cu semper a brinda nan sosten, hasta a aplaudi e maneho hiba pa ex Minister Otmar Oduber, incluso e Minister ainda Marisol Lopez Tromp.

Segun e reunion tabata andando, por a nota hopi controversia, primeramente pa Parlamentario Ricardo Croes, kende a cuminsa pa cuestiona e hecho cu el a wordo mal usa pa henter e proceso aki y na final di dia a pesar cu el a firma e peticion p'e reunion p'e mocion di desconfiansa, ta bira grita practicamente cu su persona tin tur confiansa den Minister Lopez Tromp.

Otro Parlamentario cu a haci expresion yamativo ta Edgar Vrolijk (MEP) kende a laga sa cju e unico Minister integro ta Evelyn Wever Croes. Kier men ningun di e otro Ministernan e ta confia y no ta goza di credibilidad. De facto, Gobierno mester bay cas.

Pues aki pueblo por a tuma nota cu di desconfiansa den e Minister poni preto riba blanco di Ricardo Croes, a wordo converti den un mocion di confiansa, loke a wordo ratifica p'e propio Ricardo Croes, cu ta otro muestra di falta di seriedad total di su parti.

Tin cosnan cu a wordo bisa durante di e reunion aki cu tabatin un peso formal sigur ora cu Alvin Howell, kende tabata colega di Marisol den partido POR y den fraccion di POR, ta bisa cu sea Marisol ta bay of Gobierno ta cay.

Mas cla Howell no por tabata den su pensamiento, pero for di momento cu e Minister a bira liga su persona na cierto contractnan di un compania di seguridad, e situacion a bira asina mas serio y cu a pone hopi hende pensa cu enberdad e posibilidad ta grandi cu Gabinete Wever Croes lo no tin mucho probabilidad pa keda sigui existi.

E posicion tuma pa Parlamentario Daphne Lejuez tambe a muestra bon cla cu pa baha Minister Marisol, e voto di Ricardo Croes ta di vital importancia, pero for di momento cu e Parlamentario di RED a hiba palabra, e mayoria rekeri di parti di e fraccionnan cu ta sostene Gobierno pa baha Marisol, ya no tabata existi.

A keda e ora 10 miembro di e fraccionnan cu ta sostene e coalicion cu t'e 8-nan di MEP y dosnan di POR pa logra pasa e mocion di desconfiansa, sigur mirando cu fraccion di AVP, no kier a forma parti di e comedia aki cu a bin ta tumando lugar pa algun tempo caba.

Na momento cu Minister Marisol a hiba palabra, por a ripara cu hopi di e miembronan aki di e fraccionnan di Gobierno, a keda impresiona sin mucho argumento pa usa na momento cu nan a hiba palabra ya cu ta regarda un ex Minister cu mayoria di nan a eleva pa ta un salvador di Serlimar, cu tin un vision pa sirbi interes di pueblo.

Varios di nan a sostene e maneho tambe cu ex Minister Otmar Oduber a hiba pa loke ta otorgamento di tereno y mayoria di nan, incluso e actual Minister Marisol Lopez Tromp, na dos ocasion a aproba miyones di florin pa hinca den Serlimar p'e compania aki por sigui ehecuta su servicio na pueblo.

Mester bisa cu Minister Marisol Lopez Tromp a muestra impresionante, el a trece cosnan den claridad di e ex Minister, kende el a reemplasa, contractnan, acuerdonan, nombramentonan y cantidad di otro asunto mas.

En berdad impactante, en berdad sumamente serio y condenabel, pero mientras cu e Minister a wordo elogia pa su integridad, ta lanta e pregunta ta kico e Parlamentario Marisol a haci tur e tempo ey cu tabata den Parlamento?

No ta trabou di su persona y resto di Parlamento pa controla maneho di Gobierno? No t'e era nobo cu a wordo anuncia na inicio di Gabinete Wever Croes cu fraccionnan den Parlamento lo hiba un control riguroso riba maneho di Gobierno den su totalidad?

No ta mesun hendenan aki a segura pueblo cu nan lo percura pa pueblo haya un gobernacion transparente y cu ta cumpli cu reglanan di bon gobernacion?

Con cosnan por a yega asina leu sin cu ningun miembro di e fraccionnan cu ta sostene Gobierno cu excepcion di Daphne Lejuez por a nota cu tin cosnan cu no ta bayendo bon.

Cantidad di loke Minister Marisol Lopez Tromp a presenta diabierna den Parlamento, tabata circula riba rednan social, pero nunca a pone atencion n'esakinan y riba dje Parlamento tin derecho di haya documentonan cu e tin mester pa hiba su control riba e maneho di Gobierno.

Minister Marisol Lopez Tromp tambe mester por tabata na altura di esakinan, e tabata cerca di ex Minister Otmar Oduber, e tabata na altura di nombramentonan cu su partido POR a haci na Serlimar, pero nunca durante varios reunion cu ex Minister tabata na Parlamento pa duna informacion, Marisol a haci un pregunta of a pidi claridad cerca su colega di partido.

Despues di tur loke el a presenta diabierna ultimo en berdad a keda demostra y confirma cu Minister Marisol Lopez Tromp ta un Minister n'e momentonan aki sin sosten di un partido politico, sin sosten mayoritario den Parlamento.

Minister Marisol semper ta papia di bon gobernacion, di integridad y esakinan ta nifica tambe cu na momento cu por ehempel den Consejo di Minister e no ta conta sosten di su coleganan, ta na su lugar e entrega su retiro ya cu en realidad n'e momentonan aki, Marisol no ta pertenece na ningun partido politico.

Nel Oduber a cambia di opinion?

Awor e lider honorario ta haya cu ta tempo pa AVP y MEP evalua pa traha hunto

“**SCUCHANDO** e politiconan y e situacion den pueblo den e dianan aki, mi ta kere cu a pesar cu no ta oportuno, no ta keda nada otro cu consulta pueblo con ta sigui. Mirando e diferencianan, e acusacionnan ta practicamente imposibel pa sigui hunto”, asina Nelson Orlando “Nel” Oduber, ex-Minister Presidente di nos pais, miembro honorario di MEP a scirbi riba su pagina di Facebook.

El a conclui cu mester pone AVP y MEP na mesa pa goberna, un opinion liña recta contrario na locual e mes a conseha algun siman pasa. Ta obvio cu e ex-lider di MEP a recapacita masha liher den e reunion di diabierna!

“Tin lo kier pa cera tur hende y ta yama otro pa tur sorto di cos caba!! Mas cu 2 luna ya a bay perdi. Nos ta secuestra den un discusion inutil cu ta stroba progreso di nos pais”, asina Nel Oduber ta opina riba e impasse cu a presenta den coalicion MEP-POR-RED.

Desde 1986 cual partido grandi cu gana eleccion y no haya mayoria ta depende di un partner of mas di un partido chikito pa forma Gobierno. E partido chikito tin bez e por negocia 2 caminda cu e partidonan grandi, unda e ta bay y kico e ta haya, hasta tin ora si no recompensa nan na un forma desproporcional, nan no ta forma cu bo. Nan practicamente tin e yabi y por hasta basha bo Gobierno abou pa discusion of problemanan interno.

E realidad ta cu den un estado di derecho bo por funda un partido pa bay eleccion. Mayoria bez bo ta haya partidonan di hende cu a rabia cu un partido grandi y pa venga ta lanta un partido den pura y busca candidatonan. E problema cu un partido asina tin ta con ta traha un estructura, un programa y esun mas dificil ta con ta recluta hende bon prepara, serio y responsabel cu ta dispuesto pa traha duro y sirbi e partido y Aruba.

Fuera di e dificultadnan aki, e votador den pueblo aki te ainda hopi no ta preocupa cu e programa, pero ken e hende ta y kico lo bo por tin na dje. Tambe hopi hende bon studia tin miedo di drenta politica, pasobra nan mama, papa, ruman y famia tur ta haya ora argumento caba pa critica e politico. Lastra nan ta lastra bo y calumnia bo!

E ta birando segun mi desde 1986 hopi dificil mes pa haya candidato y hopi bez e tempo t’asina cortico cu ni conoce bo no conoce otro bon y ta haya bo ta traha y yena lista cu hendenan cu lo no yuda bo, pero mas bien ta buscando un otro oportunidad den bida. Eyden mi kier ta. Si bo mira cuanto partido a funda asina desde 1986 y cuanto ta existi, te ainda gran mayoria a dispare of ta bay ser dissolve.

“Mi ta kere cu mirando e magnitud di nos problemanan financiero, ta den 2 partidonan grandi mester busca e solucion. Desde 1986 tabata imposibel pa nan 2 traha hunto, pero ta yega un momento p’e estabilidad politico cu mester di dirigentenan cu mester sinta pensa con lo por crea un ambiente pa dera e hacha di enemistad y purba lubida pasado. Ami mes honestamente a purba ya caba na 1994 y e intento aki a fracasa y a laga cerca mi un sabor hopi amargo cu palabracionnan politico no bal nada y ta biento.

Nos desconfiansa tabata mucho grandi y e rivalidad nos no por a vence nan ni supera nan. E nucleo di partidonan no tabata confia e cos”, asina Nel Oduber a conta.

“Awe 2020 mi ta kere cu mester tin un espacio pa despues di un eleccion nobo e partidonan grandi cuminsa duna otro espacio a pesar cu mi mes tin mi reserva nan. Si nos no cuminsa prepara pueblo p’esaki mañan e 2 partidonan grandi aki, si nan no haya un mandato cla, nan so lo mester atrobe bay bende nan mes caro cu partido nan chikito sin estructura y contenido real. Si bo no dunami, mi ta bay otro caminda!”, di acuerdo cu Nel Oduber.

Cu lo tin partidonan chikito, t’oe prijs cu nos mester paga pa tin democracia. E ta un derecho fundamental. E programanan pa eleccion mester ta di accion y no un buki yen di cos cu papel ta wanta, pero no financieramente ehecutabel ni realisabel.

No pone promesa populista cu no tin placa pa pag’e y pa cada cos cu bo pone pa haci den e programa, haci un calculacion cuanto e ta costa y ken y con ta bay paga pe!!!!

Kico t’e sacrificio nan cu ta ser pidi di e pueblo. E debatenan politico ta perdemento di tempo, pasobra tur lider lo keda diplomatico den su contestanan. Ningun lo kima nan dede pa no haya bo voto.

Si nos no crea un ambiente di traha caminda pa estabilidad politico nos lo keda cada bez cu ripiticion di locual tin nos casi 3 luna secuestra y ta tumando lugar keto bay.

Ken lo sali menos herida, pero ya caba pueblo mes ta herida caba!!

Politiconan ya caba e ambiente ta mucho negativo cu tur sorto di acusacion. Ora nan ta hunto nan stima otro y asina nan bay ta cuminsa bende pisca putri di otro siendo nan tur tabata hunto, unda tur cos cu a tuma lugar bo tambe tabata parti di dje, pero bo a prefera tambe di no tende ni mira nada cu tabata tumando lugar di keda keto y awor diripiente bo so a keda cu “man limpi y desinfecta tambe pa colmo”. Mucho hende ta sin trabou, entrada y ta den un pobresa caba. Opinion publico a cuminsa fada di tur ora pleitamento entre e politiconan. Hasta sa puntra si ta resta tempo pa traha mes ainda????

“Ta keda na Boso pa crea e ambiente di un dia por traha hunto na bienestar di nos pais. Lo no ta facil, pero den un crisis grandi asina bo interes politico mester ta subordina n’esun di pueblo cu ta ban nos tur sirbi bienestar general di un y tur. Lo no ta facil, pero cuminsa crea e ambiente, duna otro e espacio pa purba compronde otro mihor y ban baha man un tiki di tira otro cu skop, lastra otro cu un tiki mas respet pa un dia boso lo por sinta hunto” asina Nel Oduber a conseha e hobennan di awendia activo den politica.

Un contribucion di sa un tiki con e wiel politico ta hinca den otro y a pasa basta aña aden. Un contribucion personal como un Arubiano cu ta keda biba aki den tempo bon y ora cos ta malo tambe!

Fraccion di AVP no tabatin rol pa hunga den separacion di matrimonio di POR

DIABIerna ultimo Parlamento a trata e mocion di desconfiansa contra di Minister Marisol Lopez Tromp, cual reunion a wordo solicita p'e tres fraccionnan cu ta sostene Gobierno, esta MEP, POR y RED.

Fraccion di AVP tambe a acudi n'e reunion aki, pero for di prome cu e reunion a inicia caba, e unico rol cu e fraccion berdad aki por a hunga, tabata di scucha mescos cu tur otro hende, kico Marisol tin pa bisa of trece dilanti.

Hecho ta cu Minister Marisol den henter su maneho for di dia cu el a huramente como Minister na januari ultimo, nunca a informa Parlamento di loke el a bin ta haciendo, di kico el a descubri y kico ta pasando, a pesar cu el a suspende y hasta bay over na retira funcionarionan for di nan puesto.

Sinembargo varios miembro di fraccion di AVP a hiba palabra, pero den un intervencion cortico mirando cu e conflicto grandi aki, tabata mas bien un guera entre e fraccionnan cu ta sostene Gobierno. Como fraccion di AVP, cu tin algun aña caba no ta haya oido pa reunion of pa ricibi documentoann cu nan ta solicita, tabata dificil pa nan tin algo di muestra den henter e confrontacion cu a surgi awor entre Minister di Infraestructura y su ex colega Minister y ex lider di su partido.

Riba medionan social a wordo indica cu AVP mester hiba mas oposicion y tuma un posicion den e asunto aki, pero mescos cu henter pueblo, ta diabierna ultimo e fraccion berde a bin scucha oficialmente di cosnan cu ta pasando, cu nan tin hopi tempo cuestionando caba.

Durante di pandemia y lockdown, fraccion di AVP a tene conferencianan di prensa na varios sitio, lugarnan caminda tin hopi desaroyonan tumando lugar cu no ta bon, a exige claridad y informacion riba esakinan, pero nunca a haya reaccion di Gobierno.

Uno tabata e compra of contract di huur di e edificio conoci como Brownbuilding, caminda Polis lo a muda p'e edificio aki y riba cual tambe tin desaroyonan no mucho positivo awor ta sali na cla. A reuni dilanti di edificio di Serlimar na Pos Chikito na varios ocasion cuestionando e maneho, cuestionando e vision di e ex Minister Otmar Oduber riba e proyecto aki, pero cu awor ta resulta cu en berdad tabatin un situacion inaceptabel cu tabata tumando lugar.

Fraccion di AVP tambe a reuni na dump, caminda tin contractnan a wordo firma cu ningun hende tin claridad ariba, dilanti edificio di Aeropuerto, caminda tambe un Minister a declara na un medio di comunicacion, cu tin un compania priva cu kier a cumpre, pero te dia di awe ningun reaccion a bin for di Gobierno. Siman pasa lider di fraccion di AVP, Marlon Sneek a declara cu e ta dirigi un serie di pregunta na Prome Minister Evelyn Wever Croes, relaciona cu informacionnan di medionan di comunicacion, caminda varios contract dudoso a bin dilanti, varios otorgamento di tereno a tuma lugar contra reglanan existente, pero cu ainda no a haya contesta for di Gobierno.

Diabierna tabata mesun situacion, esta cu fraccion di AVP simplemente no tabata na altura di decisionnan cu e ex Minister Otmar Oduber lo a tuma durante di su maneho, pero aki tin cu menciona cu hasta e propio miembronan di fraccionnan cu ta sostene Gobierno, no tabata na altura di esakinan.

Mescos cu henter comunidad, fraccion di AVP por a sinta scucha, por a sinta mira e confrontacionnan y no a reacciona tampoco ora cu algun miembro di fraccion di MEP, a trata di involvi AVP den un intento pa desvia e atencion di loke ta pasando den un Gobierno cu a presenta su mes como Gobierno integro.



fun miles

Bo merece un FUNcation!
Spaar Fun Miles, disfruta y **GANa!**

Haci di bo staycation un FUNcation
cu chance di gana premionan fabuloso tur siman!

Weekendstay den hotel aki na Aruba!
Day trips FUNtastico!
Diferente premio **fun pa disfruta na cas!**
10.000 Fun Miles tur siman y mas!

Participacion ta facil!

- Cumpra y Spaar Fun Miles serca tur Partner!
- Bishita **funmiles.net** pa mas informacion y sigui e stapnan

Adicional! Comparti un potret di bo FUNcation riba nos rednan social pa un chance di **gana tur siman 5.000 Fun Miles!** Sigui e fun y descubri ofertanan pa bo FUNcation riba **f i t #funcation**

E campaña aki ta valido te cu dia 24 di augustus 2020

Fun Miles Explore the fun!

Gana hopi premio fabuloso y **10.000** Fun Miles tur siman!

Cosecha celebrando su prome lustro



E team di Cosecha y artesanonan afilia ta celebra awe e prome lustro di Cosecha. 5 Aña pasa e tienda di artesanía Cosecha a habri despues di investigacion, dialogo y organizacion extenso, algun aña caba procedente di Departamento di Cultura Aruba, ora a constata cu e artesanía traha na Aruba tabata mester un plataforma prominente pa contra-aresta e desaroyo di artesanía y souvenir di Aruba importa.

Fundacion Centro pa Re-enforsa Artesanía y Forma Talento, esta C.R.A.F.T., a ser funda y di eynan Cosecha por a wordo estableci, cuminsando cu 25 artesano y artista, den e bunita monumento na Zoutmanstraat 1. Porfin e obrero culturalnan aki a haya un plataforma tangibel, e balor y atencion cu nan merece.

Actualmente Cosecha tin alrededor di 80 artesano representa den e tiendanan di Oranjestad, San Nicolas y e kiosko pafor di e cruiseship terminal.

Tur e artista y artesanonan aki tin e Seyo Nacional di Artesanía p'e productonan cu Cosecha ta bende pa nan.

Asina e consumidor por ta sigur cu e producto artesanal ta wordo traha na Aruba. Aparte di e prome tienda na Playa, dia 26 di november 2016 Directora di Cosecha Joanne Dirksz hunto cu

su team y bestuur di Fundacion C.R.A.F.T. a habri Cosecha San Nicolas. Un espacio hopi amplio na unda e meta pa duna workshop bou guia di artesanonan a bira realidad. E edificio aki por reconoce dor di e colorido mural riba dje di 2 flamingo cu a wordo pinta durante e Aruba Art Fair.

Den 2019 a sigui otro expansion y a habri un kiosko pafor di e cruiseship terminal. E kiosko ta chikito, sin embargo e ta brinda producto cu Seyo tambe. Aki e turista ta haya guia con pa e yega n'e otro tiendanan como tambe haya informacion di Aruba y tayernan di artista y artesanonan.

Den 2020 dor di e situacion di Covid 19 unda cu e mundo online a haya un rol mas prominente, Cosecha a encamina e proceso pa habri un webshop cu por facilita aun mas e experiencia di compra pa cliente di Cosecha.

Sigui na otro pagina >



Via e webshop Cosecha ta extende su servicio pa brinda artesanía y arte local online tambe tanto pa e mercado local como esun internacional. Na un manera safe y facil por cumpra piesanan unico y autentico. Por encontra e webshop n'e tab "shop" riba e website di Cosecha www.arubacosecha.com of por bay directamente na www.shop.arubacosecha.com

Cosecha ta cera cinco aña cu logronan importante pa artesanía di Aruba, parti di Aruba su industria creativo, p'esey ta duna un danki special na tur artesano y artista cu ta parti di Cosecha, tur cu ta of a traha den pasado n'e tien-danan. Tambe na tur cu ta of a forma parti di e bestuur di Fundacion C.R.A.F.T., haciendo esaki a base boluntario y cu hopi animo. Cosecha ta orguyoso di talentonan local y ta percura pa sigi desaroya su servicio.

Pronto Cosecha lo lansa un proyecto interactivo pa celebra su prome lustro, cu sigur lo ta un estimulo nobo riba e tereno artesanal di Aruba, pues keda pendiente pa mas informacion.

Pa mas informacion por tuma contacto cu Cosecha Oran-jestad na telefon 587-8709. Tambe por bishita e Facebook page di Cosecha: www.facebook.com/Aruba-Cosecha



Xpresa bo mes

Parlamentarionan di coalicion POR-RED-MEP a causa hopi hilaridad den pueblo

CU hopi fanfaria y bravoure Parlamentarionan di coalicion a cuminsa haci preguntanan quasi critico y skerpi na Minister Marisol Lopez-Tromp, cu a resulta mas bien un payasada completo. Despues di a warda mas di 4 ora p’e reunion por a sigui, di ripiente e “pret’i wowo” di Otmar a pidi pa suspende e reunion “tot nader orde”, locual “Adje patatje” a core aproba tambe sin duna espacio pa punto di ordo.

Awor Eefje ta desea di papia cu Minister Marisol Lopez-Tromp riba e “gepruts”, cu a tuma lugar den Ministerraad tre’i su lomba. E Parlamentarionan di POR-RED-MEP nunca por a spera cu Minister Marisol Lopez-Tromp lo a bay duna contenido real n’e asina yama “inlichtingen-en debatplicht”, lagando nan tur cu un “bek vol tanden”. No a keda e Parlamentarionan en cuestion nada otro pa sigui “links lullen, rechts zakken vullen”.

Ta un set di “watjes met een heel grote waffel” nan tur ta. En onze brave Ricardo spant de kroon!!

Awor mas cu nunca mester cuminsa haci “schoonschip” den Parlamento di Aruba.

Na Hulanda kier baha e cantidad di Parlamentarionan di 150 pa 100. Ta prefera pone enfasis riba “calidad” y “integridad” en bes di “cantidad” y “bobedad”.

Na Aruba tambe mester pensa serio pa baha e cantidad di Parlamentario, ya cu e rendimiento di e reunionnan den Parlamento ta masha pober y ta costando pueblo un dineral; mester caba cu e “showtime”!

By the way con a para cu e sistema di “checks and balances” cu regla- y convenionan bon stipula pa cu e conducta y funcionamiento di e Parlamentarionan (“gedragsregels”) tanto paden y pafor di Parlamento? (Besaril, Rocco Tjon, Ricardo boso a tende ?!!)

Number y direccion ta conoci.

Lista di corrupcion a laga fraccionnan cu boca sera, enbez di a sigui cu e segundo tanda pa tende mas

Pa: Atan Lee

Tabata e reunion di Parlamento mas sintonisa den nos historia, riba un dia historico. Atrobe por menciona con e nivel di nos Parlamento ta, cu hendenan cu boca grandi, cu ta tilda otro pa ladron y corrupto, pero ta keha ora cu Hulanda ta bin cu cierto exigencia pa ta sigur cu e placa lo yega na unda cu e mester yega. Den prome tanda Parlamentarionan cu boca grandi, despues a bira manera un cacho cu rabo aden.

Ken aki na Aruba tin confianza den nos politiconan, kendenan ta ser paga mas cu fl. 10.000,00 pa luna, pero no ta haci nan trabao manera mester ta. Ta con tanto proyectonan corrupto ta ser pasa den Parlamento y aproba?

E stul ta mucho dushi?

Boso ta representante di pueblo y mester defende e derechonan di nos pueblo, cu balentia, corahe, sin wak color politico.

Ta con bo t’esun yama pa controla Gobierno, si tin cierto cos ta pasa bao di bo nanishi y ni sikiera esaki ta kishiki?

Ta con abo cu tin cu controla Gobierno mester tende di e propio Ministernan kico realmente ta bayendo robez?

Riba dje e cantidad di corrupcionnan cu ta bin ta tumando lugar despues di nos Status Aparte.

ESAKI TA UN BERGUENSA NACIONAL

Ta boso trabao pa controla y coregi loke ta bay robez. Ta con un Parlamentario cu ta defende Gobierno ta bisa publicamente cu e unico Ministro integro ta Prome Minister, cu otro palabra tur e otronan ta hinka den un o otro cosnan ilicito?

Ora cu e berdad a cuminsa sali na cla, di bi-aha Prome Minister, kende no tabatin tempo pa negosha y resolve e problema, debi cu esaki ta un problema interno di POR, di bi-aha a yama pa para e reunion ya cu e ta cla pa negosha.

Kisas e tin miedo cu despues di dos rond, e berdadnan di e Ministernan di su partido lo sali na cla? Minister Marisol a bisa bon

cla riba e pregunta si tin mas Minister involvi, cu esnan cu ta interesa por wak e documentonan y comproba pa nan mes cu esaki t’asina.

Minister Marisol, cu sigur no ta un Santo, pero tambe tin su cosnan y hopi, cu el a haci robez, defendiendo su posicion a saca afor tur documentonan pa prueba kico el a hereda, despues di a tuma e cartera di su ex lider.

Cu cuanto maluso di placa di pueblo, siendo cu Aruba ta pasando den situacionnan financiero hopi precario, tog fiesta di gastamento di nos placa, placa di pueblo a sigui tuma lugar. Ta con tin spiritonan riba payroll?

Na lugar cu miembronan di Parlamento cu ta suppose di ta transparente, digno, honesto y integro no a lanta protesta ora cu e reunion a ser geschors, p’esaki continua p’asina nan por saca afor mas cosnan cu a bay robez cu nan aprobacion.

Un Parlamento completamente deteyoria! Boso confianza mester ta den Movimiento Futuro pa un Aruba nobo.

Booshi Wever:

E tragi-comedia politico aki na Aruba ta un tristeza pa nos aki y un hilaridad den wowo di Hulanda!



MESTER constata cu definitivamente gobernacion di Aruba ta stagna. Un ex-Minister cu ta ser investiga pa corrupcion y abuso di poder, ainda ta dirigiendo Gobierno.

Esaki claramente a sali diabierna ultimo for di e reunion di Parlamento, unda a trata e retiro di Minister Marisol Lopez-Tromp.

Segun Booshi Wever, “nos por a mira un reunion yen di “kakafonie” na comienso cu menaza y tambe expresionnan menos agradabel den direccion di mesun miembronan di partido y coalicion, loke sigur no lo contribui pa un relacion di trabou plentero pa algun tempo.

Hopi t’esnan cu a keda desepcion despues di e “schorsing di 10 minuut” cu a dura un eternidad, pa despues bin un schorsing “tot nader orde”. E expectativa p’e di dos tanda tabata halto.

Pueblo kier a haya sa mas, pero coalicion diripiente a cambia di opinion y enbes di retiro a haci un peticion pa mas intermediacion.

Diasabra Minister di Husticia tur abati, ta bin bisa cu awor si e tin pasenshi pa sigui lapi y lijn y tambe cu e no tabatin chens di defende su mes den Parlamento.

Tambe nos por a scucha di e lider actual di e partido POR cu el a lamenta e critica cu Minister Lopez-Tromp na un manera no-etico a ataca su propio coleganan Minister. Pero unda e Ministernan aki tabata ta? Segun nos constitucion, den capitulo III articulo 18 Ministernan ta liber pa atende y participa na reunionnan publico di Parlamento, cu of sin cu nan a wordo invita!

E tragi-comedia aki, cu sigur a bin ta pone cara di nos pais Aruba na berguensa mirando e rol mediocre di nos Parlamentarionan, tabatin un “MIRON” cu sigur a goza di e situacion aki. Esta Hulanda. Enbes di enfoca na atende cu e demandanan Hulandes, nos politiconan na Oranjestad ta haya gana pa cuminsa cu polemica politico partidista cu ta haci nos situacion mas debil ainda”.

UPP dia 20 di april a bolbe propone na Gobierno di Aruba pa yama un Dialogo Nacional y sugeri pa bini cu Gabinete Nacional pa atende e problemanan cu a presenta cu Hulanda. Dia 24 di juli ultimo UPP a manda pa Parlamento un peticion pa institui un Dialogo Nacional p’asina nos yega na un Consenso Nacional con nos ta sali for di e cadena di crisisnan cu nos t’aden.

N’e momento ey parce cu e atencion tabata dirigi con pa bula un Minister su cabez, meramente pa interesnan personal y partidista.

E actuacion aki sigur ta debilita mas nos posicion pa cu Gobierno Hulandes. Nos ta demostrando un inmadurez total pa nos por resolve nos problemanan y salbuardia nos autonomia y defende nos derecho di autodeterminacion.

“Drentando luna di augustus cu lo por ta un luna determinante pa cu nos autonomia y sosten presupuestario di Gobierno Hulandes, e acontecimiento y desaroyonan politico di e ultimo simannan cu su culminacion diabierna ultimo, ta pone nos di UPP sinti cu nos lo bay conoce un otro “Augustus Scur” na Aruba.

Y compara cu e “Augustus Scur” di 43 aña pasa, cu den nos historia politico ta wordo relata como un hecho positivo cu a contribui na realisacion di nos Status Aparte, e “Augustus Scur” di 2020 lo bay tin su conotacion negativo, ya cu e por hiba na hustamente na perdemento di nos autonomia, mey-mey di un inestabilidad politico y destructivo, dota di un polarisacion enorme y politisa.

Nos prioridadnan n’e momentonan aki parce di ta robez. Si nos no baha for di e cabay partidista y kita nos brilnan di nos colornan politico y pone e bril di e bandera di pais Aruba, nos lo haya nos ta doblega pa Hulanda den e luna aki.

P’esey UPP ta bolbe haci un yamada, pa tur e partidonan cu representacion di Parlamento, nos Gobierno actual, pa recapacita y pensa cu p’e aña cu ta resta pa eleccion, bin cu un Gabinete Nacional den forma di un zaken/takenkabinet/crisiskabinet cu ta carga sosten di tur partido den Parlamento.

Un periodo di eleccion awor, manera ex-lider di MEP ta propone, no ta combini Aruba n’e momentonan aki. E cambio di idea p’e dos partidonan aki bay traha cu otro sigur ta uno bon bini, pero UPP ta kere cu e dos partidonan aki mester muestra e intento aki awor, mey-mey di e crisis actual.

Si nan cera cabez cu otro por bin un Gabinete di Experto cu lo tin di traha riba un lista di tareanan specifico di e.o. mara mannan di e politiconan, p’asina percura pa crea un ambiente nobo na momento cu eleccion di 2021 presenta. “United we stand, divided we fall and perish”, lider di UPP, Booshi Wever a conclui.

Carlos Bislip & Friends den Music Exposure di Cas di Cultura

Pa Addonsito Croes



FIN DI siman nos tabatin e honor di ta presente den e evento Music Exposure di Cas di Cultura. E siman ey tabata beurt di Carlos Bislip y amigonan musico.

For di e prome momento cu e quinteto a start cu nan repertorio, e publico a ser hiba den e ritmo nan di Jazz y Musica Latino cu cancionnan di Aruba.

E musico orguyonan di Aruba tabata Carlos Bislip (drums), Ivan Quandus (baho), Angelo Kock (piano), Denzil Tromp (conga) y Franklin Grana-dillo (trompet).

Algun cancion presenta tabata “Fiesta den Cura” (Lio Booi), “Circumstances” (Angelo Kock), “Unoca Care Jam” (Ivan Quandus) y “Sunu y Vulnerabel (Carlos Bislip).

Na final e publico a brinda e quinteto excelente aki merecidamente un standing ovation. Tambe Carlos a expresa palabranan di aprecio pa staf di Cas di Cultura, Semi Chahmy Productions y e musiconan unico cu a haci e evento aki posibel.

Ganadornan Rifa di Barracudas Aruba 2020



MAYORNAN y directiva di Barracudas Aruba, Club di Landamento Artistico a organisa un grandioso rifa cu e meta pa recauda fondo pa competi n’e competencia internacional Cancun Open 2020 cu lo a tuma lugar dianan 2 – 7 di juni 2020. Lamentablemente debi na Covid-19 e plannan a schuif y lo dedica e fondonan aki pa competencianan internacional den 2021. Nos kier a gradici e pueblo dia Aruba completo pa a yuda nos atletanan y nos club. Tambe un danki na mayornan cu a yuda segura sponsor y principalmente un danki di curason. Tur ganador lo ricibi un yamada cu fecha y orario pa buska nan premio.

Diasabra ultimo dia 25 di juli a saca e 15 ganadornan via tombola y resultado ta como lo siguiente:

Barracudas Raffle 2020	Winner Name	Ticket Nr.
Weekend Stay by Hyatt Place Aruba	Air Tech	02322
Inverter 12.000 BTU Air conditioner by AirTech	Tico Kock	00052
UTV Tour for Two (2) by Fofoti Tours	L. di Vecchia	05452
Palm Pleasure for Two (2) by De Palm Tours	Jesus Thode	00292
Gift Certificate by Aqua Grill US\$100	Good Lock & Key	04684
Silver Package: 12 classes for a month by Muscles and Lungs CrossFit	L. di Vecchia	05455
Silver Package: 12 classes for a month by Muscles and Lungs CrossFit	Air Tech	02360
Gift Certificate by Setar N.V. Awg. 150,=	Drs. Y.N. Morales-Thuis	01984
Gift Certificate at The Cinemas Awg. 50,=	Raheem Reeberg	04478
Gift Certificate at Fantastic Gardens Awg. 50,=	Maria Andrade	05516
Gift Certificate at Flora Market Awg. 50,=	Simon K	05305
Gift Certificate at Trash by Ronchi Awg. 50,=	Cheryn Kock	04638
Gift Certificate at TriBike Awg. 50,=	Nicole Hoevertsz	04880
Gift Certificate at Citgo Savaneta Awg. 50,=	K. Simon	04263
Gift Certificate at Plaza Bookshop Awg. 50,=	Emely Pablo	05489

Homber a kima seriamente momento cu el a bay cende un bbq pit



DIASABRA mainta tempran pa mas o menos 7’or informacion a drenta cu un persona lo kima, despues di a bay cende un BBQ pit. E cabayero preparando e pit di tempran no a spera cu algo lo bay robes. Durante cu e cabeyero a benta e likido e lo a pega un parti di su curpa na candela.

Algun persona cu a scucha gritonan di dolor a core yega cerca, y a haya e homber herida na suela. Den tur su angustia e tabata purba muha su curpa cu awa cu sigur tabata algo bon. Mientrastanto Polis y ambulance tabata yegando n’e sitio. Paramediconan na yegada mesora a cuminsa trata e homber y despues a sali cu urgencia direccion Hospital cune.

Chauffeur herida na cabes, despues di a accidenta riba rotonde di Hospital



DIASABRA algo prome cu 12'or mey anochi, Polis a bay e rotonde cu ta conecta cu Caya Punta Brabo. Eynan lo a sosode un accidente y e chauffeur lo a resulta herida.

Na yegada Polis a constata cu ta trata di un vehiculo so, ta trata di un Glanza color blanco.

E chauffeur tabata biniendo for di panort, y dado momento a perde control riba e auto y a bay termina contra e acera parti pabou.

Un impacto basta fuerte unda cu e auto a subi acera y por a mira cu ambos airbag a sali. Den e impacto e chauffeur lo a haya golpi basta duro na cabes.

Na yegada di ambulance e Paramediconan a atende y despues a opta p'e bay Hospital cu ta algun minuut leu di unda el a accidenta.

Compania di seguro tambe a presenta y un takelwagen lo mester a presenta pa move e auto cu no por a core mas riba su mesun forsa.

Chauffeur lo a bira malo, despues cu el a wordo deteni pa core auto burachi y ocasiona accidente



Royal Aurora
Funeral Home & Crematory

Habri portanan santu pa mi,
mi ke drenta y alabá Señor.
Ata e porta di Señor aki,
tur e fielnan ta pasa den dje.
Mi t'alabá bo pasobra B'a skucha mi,
pasobra B'a manda mi salbashon.
Salmo 118: 19-20-21

Cu dolor na nos curason,
nos ta anuncia fayecimento di nos ser stima:

Sr. Wilson E. Barreto Ochoa
*05-07-1961 - †30-07-2020

Na nomber di su:
Adorada esposa: Vilma Barreto Ochoa-Bremo
Yiunan: Jennyfer Barreto y Paul Kemp y famia
Josette Barreto
Jo-Anne Barreto y Fermin Thijssen
Antonio Barreto y Greynaly Tromp y famia
Preti wowo: Deli-Anne Kemp
Mama stima: †Maria Evelia Ochoa Perez y Antonio Loefstok
Tata: †Eugenio Barreto Patino y famia
Rumannan: Naysla Barreto Ochoa
Luis Fernando Barreto Ochoa
Robert Alberto Barreto Ochoa
Juan Pablo Barreto Segura
Maner ruman: Chica
Swa- y cuñanan
Sobrino- y sobrinanan
Ihanan
Su amigonan y staff di dialyse IMSAN y tambe na tur e dokter nan cu semper tabata pendiente di dje.

Famia y conocinman tanto na Aruba manera na Colombia cu ta asina tanto pa menshona.

Disculpa nos pero despues di despedida nos no ta ricibi bishita di condolencia na cas.



DIASABRA atardi laat Polis a bay un dalmento na Pos Chikito, unda cu un pick up flatbed a drenta un cura di cas.

Na yegada Polis a topa cu e un flatbed pick-up color blau, pero e chauffeur no tabatey.

E chauffeur lo a cana bay un bar restaurant ey banda.

Polis a bay e establecimiento y a haya e homber y a detene debi cu e ta bou influencia. Un K9 Unit den becindario tambe a bin duna un man.

E accidente a sosode momento cu e chauffeur no a para na un T-kruising y a sigui bay dal contra un cura di cas.

Despues Polis a haya e chauffeur y a bay over na detene dor cu e ta bura-chi, e lo a cuminsa haya dolornan fuerte den pecho

Parce cu cada biaha e dolor tabata bira mas fuerte y esaki a bira un motibo cu e agente n'e sitio a pidi ambulance cu mas urgencia.

Na yegada Paramediconan a controla a e homber y a haya cu tabata necesario transporte pa Hospital.

Mama a pidi asistencia di Polis pa yiu cu a bay cu su auto sin permiso

Royal Aurora Funeral Home & Crematory

Mi no a muri, ta pesey mi no a despedi y bisaayo
Semper recorda mi como un bon tata, bon welo, omosuegro y bon amigo

Keda semper cu tranquilidad y amor pa boprohimo y firme den bodesicionan y laga semper Dios obra den e caminda di bida. Cu hondapena, peroagradecidona Dios pa loke e la haci y nifica pa nos, di por a dunanos un bon Tata, Welo, Omo, Suegro y Amigo

Nos ta participa fayecimento cristianamente di:



Sr. DAVID JOSE MADURO

* 22-07-1932 - †28-07-2020

† Viudo di Señora Rufina Maduro Sevinger

Condecora: den Ridder van Oranje

Promemiero di comision di nos Himno y Bandera
Ex Director di Tijdelijk Arbeidsvoorziening (TAV)

Na nomber di su:

Yuinan: Glenda Zavala Maduro
Bettina Maduro y Michel Frank
Unico nietastima: Bettiza Koolmanna (Orlando) Florida
Rumanan: Celia Maduro
Milton Maduro y Juinanna Hulanda
Omonan: Alfredo Ruiz y familia
Marciano Ruiz y familia
Manerayiu: Theresa Quandt na Hulanda y yuinan
Felix Zabala Figeuro

Cu un amor manera un yiu: Evelyn Wever Croes y Xiomara Maduro
Agradecido pa su Amor dedicacion pa a yudanos tata stimana Cas: Señora Sonia Araujo
Agradecido na sudocroes y amigo Dr. John Croes
Agradecido pa semper tawatatey pa nos tata Sr. Liberato Hoek

Sobrino(a)nan stima:

Jose Carlos Maduro y famiana Colombia
Nuris Maduro y famiana Colombia
Carlos Maduro y famiana España
Diana y Fenna Maduro na Hulanda
Linda y Rudi Houthuijs Maduro y yui Thomas na Hulanda
Grace y Huub Gubbels y famiana Hulanda
Edna Maduro na Hulanda

Tur Subrino y Subrina nan di partisud defunta esposastima: Sevinger, Hoek, Ridderstap, Gomez, Quandt.

Mihoramigonan di cas: Rudy Croes y familia
Nelson Orlando Oduber y familia
Gustavo (Tatata) Pablo y familia
Joe Koolman y familia
Leo Lopez
Beatrix Winterdaal


Demas famia: Maduro, Sevinger, Koolmam, Swaen, Odor, Fingal, Capello, Frank, Hoek, Suriel, Ridderstap, Gomez, Quandt, Dirks, Wever-Croes, Houthuijs, Croes, Oduber, Araujo, Figeuro, Lopez, Winterdaal, Gubbels

Amigonan di su Partido cu elalucha semper pe Movimiento Electoral di Pueblo (MEP)

Ta invita pa acto di condolencia y despedida cual lo tumalugarna Aurora Funeral Home dialuna 3 di augustus, 2020, di 1:00 pa 3:30 condolencia y despedida y pa despues hiba nos tata stimanasu ultimo lugar di sosiegona Sabana Basora.

Di 11:00 pa 12:00 papa lo ta reposanasu kas den ceno familiar

Nos disculpasi den nos momento di tristesanos por a lubida un famia of conoctr.



DIASABRA den oranan di merdia un mama preocupa a yama Polis y ta avisa nan cu su yiu homber a bay su auto nobo.

Manera esaki a sosode Polis a cuminsa move, buscando un Toyota Yaris color cora. Dentro di algun minuut un patruya lo a spot e auto den area di Alhambra.

Brevemente a perde di bista, pero a bin localisa e yiu homber y e auto riba e tereno di Divi All Inclusive.

Aki agentenan a detene e hoben kende ta un pashent di Respaldo y segun por a conpronde e lo tabata bou influencia di un of mas substancia e momento ey.

Polis a pidi transportwagen y tambe takelwagen pa bay cu e auto.

Parlamentario ta puntra:

A fiha fecha di eleccion otro aña dia 19 maart 2021

WILLEMSTAD - E parlamentario Obispo di PAR a manda informá Minister Konket cu tin tópiconan super importante pa resultadonan di gobernacion di pais Còrsou 2017-2021 y tambe pueblo di Còrsou. Pues intencion di su carta parlamentario ta:

(1) E sa cua t'e status di e "Ontwerp landsverordening tot wijziging van het Kiesreglement Curaçao (Zittingsjaar 2015-2016-104)". Cual ainda awe e "Memorie van Antwoord" ta pendiente contesta dor di e 2 Gobièrnonan anterior plus Gobièrno actual, for di 8 febrüari 2017; (2) Cua t'e status di e "Ontwerplands verordening tot instelling van een Electorale Raad (Landsverordening Electorale Raad)" y tambe e Ontwerplandsverordening strekkende tot oprichting van een Bureau Integriteit (Landsverordening Bureau Integriteit).

Pues pa medio di e carta aki Obispo a haci e siguiente 3 preguntanan simpel, còrtico y al caso na Minister Armin Konket, haciendo uso di artículo 57 di Areglo di Estado di Còrsou (nos ley máximo) y tambe artículo 96 di Reglamentu di Órden di Parlamento di Còrsou:

1. Cua t'e status exacto di e "Ontwerplands verordening tot wijziging van het Kiesreglement Curaçao (Zittingsjaar 2015-2016-104)"?

Dicon e "Memorie van Antwoord" ta tardando 3 Gobièrno caba plus 3 aña y 175 dia, pa Parlamento di Còrsou haña contesta via di "Memorie van Antwoord"?

2. Faltando awe 232 dia pa elekshon programa di cada 4 aña (a base di artículo 41 di Areglo di Estado di Còrsou y tambe Ley Electoral di Còrsou), e fecha di e siguiente eleccion ta fiha caba riba diabièrnè 19 maart 2021.

Pregunta: Parlamento di Còrsou por spera di ricibí den e luna di augustùs 2020, e Ontwerplands verordening tot instelling van een Electorale Raad (Landsverordening Electorale Raad)? Si òf no? Dicon si òf no?

3. Faltando awe 284 dia p'e periodo legislativo actual (a base di artículo 41 di Areglo di Estado di Còrsou) di Parlamento di Còrsou 2017-2021 terminá, Obispo tabata kiera sa e status exacto di e Ontwerplandsverordening strekkende tot oprichting van een Bureau Integriteit (Landsverordening Bureau Integriteit)?

Parlamento di Còrsou ta bay ricibí esaki promé cu entrega di Presupuesto 2020 di pais Còrsou, pues promé cu diamars 8 sèptèmber 2020?

Hibando alimento y paña Venezuela:

Boto di Bon Samaritanonan a bòlter riba laman bruto



WILLEMSTAD – Diabierne mainta 31 jüli 2020, alrededor di 07:35 RCC di Wardakosta a ricibí un yamada via VHF canal 16 di e boto "La Menta" cu a caba saca 3 persona fo'i den laman despues cu nan boto a zink.

Mesora a saca un Metal Shark pa bay asistí e personanan. E stationsschip, cu ta patruyando pa Wardakosta tambe a bay yuda anto a lansa un di nan Frisc pa jòin e Metal Shark.

Na yegada di e patruya di Metal Shark, nan a topa cu 3 persona di nacionalidad Venezolano.

E team di Metal Shark a hiba e personanan na pier di Santa Barbara pa por averigua kico a pasa.

For di e relato di e personanan por a comprendé cu nan tin 2 aña ta biba na Còrsou anto 3 luna pasá nan a cumpra e boto "TISORANJE" asina cu nan por hiba cuminda y paña cu nan a recaudá, pa nan famia na Venezuela.

Nan a sali diahuebs anochi banda di 10'or fo'i Spaanse Water rumbo pa Venezuela. Banda di 1'or madrugá nan boto a bòlter. Despues di a toma nota di e relato e team di Wardakosta a parti tapaboca n'e personanan.

Aunke cu nan no a yega Venezuela, pero pa precaucion a hiba e personanan Warda di Polis na Rio Canario. Mientrastanto e Metal Shark y e FRISC a sigi busca rond di e boto anto a haña algun saco cu paña y cuminda.



AWEMainta

E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL